



國家清史編纂委員會·文獻叢刊

七編

清代稿鈔本

第三〇九冊

國家清史編纂委員會・文獻叢刊

七編

清代稿鈔本

第三〇九冊

廣東省立中山圖書館
中山大學圖書館

編

主編 桑兵
副主編 李昭醇 程煥文 劉洪輝

SPM

南方出版傳媒
廣東人民出版社

・廣州・

第三〇九冊目錄

鴻軒隨筆

鴻軒隨筆

八卷

李慎儒 撰

鈔本

攷訂之學 國朝最盛 亭林潛邱開其先 乾嘉諸老
繼之 今讀此篇 淹貫群籍 持論精審 足以方軌前秀
佩服佩服 僕亦好雜覽 苦姿性太拙 掩卷輒忘 偶有
管窺之見 郢書燕說 都不足存 可愧也 三復斯編 彌
增不學之懼

光緒十年歲在閏逢涖灘夏五月小弟吳丙湘拜讀
謹識

鴻軒隨筆

子均潛研經史于書無所不讀別有獨見則自跋于
後日久積成卷帙為鴻軒筆記四冊共八卷軟紅塵
中能閉戶讀書者目中罕見子均精進不懈日與古
人相對自有怡然自得渙然冰釋之候豈他人所能
共喻也哉

辛巳冬日荆溪年小弟任凱拜讀謹識

鴻軒隨筆自序

天下事莫樂於讀書亦莫苦於讀書而今人之苦視古人更甚古人之苦鉤深索隱寢食俱廢至嘔出心血止耳今則不然十齡外即執筆學為時文稍事雜覽師友輒呵止之謂不利考試惴惴然避人竊閱其形狀與穿窬等未幾齒加壯功名心不得不急而時文果已不工乃決計棄書不讀而結習已久其不忍棄書之心終牽制于寤寐時悔時慕神不專一於時文究無所成回念生平精力全銷磨於或讀書或不

鴻軒隨筆

自序

讀書或攻時文或不攻時文之間欲以讀書人自例
不可欲以攻時文人自例亦不可張々乎如瞽者之
立歧路東西南北不知所之者嗚呼是真苦矣余年
十七八時好讀書今決計不讀矣偶檢舊篋見昔年
手錄所得若干條復不忍竟棄釐訂存之倘即所謂
時悔時慕張々然歧路之瞽者耶嗟乎人生不過百
年始為時文所阮考試仕宦家室應酬迭出攬援忽
焉與草木同腐良可悲也自今以往予所得其止於
此手抑或不止於此乎予烏能自料乎眇者不忘視

姑誌贅說卷首為他日思
同治戊辰孟春鴻軒氏自記

鴻軒隨筆

自序

鴻軒隨筆卷一目錄

縱囚

星象集說

剃

搗手

鹽字音義

俗字有本

明乳母之重

孟子逸文

水皮

五通神不始於明

工夫當作功夫

明代剝皮之刑

謚法繆字

揭要當作接要

明宦官用事紀要

女子貴相不足憑

鴻軒隨筆

卷一目錄

伏波銅柱考
海外文獻
穀樹

骰子甯作投或作頭
外國好自誇道里之遠
史傳中古字字典不載者

鴻軒隨筆卷一

縱囚

六一居士縱囚論為時君好名而作後人遂以為通論未免為古人所誤然即此亦可知歐九不讀書之果然也嘗考唐太宗以前縱囚之見於史策者凡有數條後漢書虞延傳延除緄陽令每至歲時伏臘輒休遣徒繫各使歸家并感其恩德應期而還有囚於家被病自載詣獄宋書謝方明傳方明為竟陵太守嘗年終江陵縣獄囚悉散聽歸家使過正三日還到

應罪入重者二十餘人主簿固諫方明不納一時遣之至期有重罪二人不還方明不聽討捕其一人醉不能歸逮二日乃返一囚十日不至五官朱千期請見欲白討之方明使左右謝五官不須入囚自當返囚遂巡墟里不能自歸鄉村責讓之率領將送竟無逃亡者梁書王志傳志為東陽太守重囚十餘人悉遣還家過節皆返惟一人失期獄司以為言志曰此是太守事主者勿憂明旦果自詣獄辭以婦孕吏民益歎服之又梁書處士傳何胤為建安太守為政有

恩信每伏臘放囚還家依期而返南史席闡文傳闡
文為東陽太守冬至悉放獄中囚依期而至又後漢
書鍾離意傳詔意部送徒詣河內意遂於道解徒桎
梏怨所欲過與剋期俱至無或違者後除瑕丘令遷
堂邑令縣人防廣為父報讐繫獄其母病死意聽廣
歸家使得殯殮丞掾皆爭不聽廣殮母訖果還入獄
梁書傅岐傳岐除如新令縣民有因鬪相毆而死者
郡錄其仇人考掠備至終不引咎乃移獄於縣岐命
脫械以和言問之便即首服法當償死會冬節至岐

乃放其還家使過節一日復獄曹掾固爭岐曰若其
負信縣令當坐主者勿憂竟如期而返北齊書良吏
傳張華原為兗州刺史獄先有囚千餘人華原皆決
遣至年暮惟有重罪者數十人華原亦遣歸家中
依期至獄後周書蕭瑒傳為上州刺史至元日獄中
有繫囚悉放還家聽三日然後赴獄諸囚荷恩依限
而至隋書循吏傳王伽為齊州行參軍送流囚李參
等七十餘人詣京師時制流人皆枷鎖傳送伽行次
滎陽哀其辛苦於是脫其枷停援卒與期曰某日當

至京師如致前却吾嘗為汝受死舍之而去流人咸
悅依期而至一無離叛上聞而驚異之悉召流人并
令携負妻子俱入賜宴於殿庭而赦之凡此數條皆
在唐以前何獨於太宗肆議耶

愚案歐公一生廉隅有餘平正不足如高給諫人品
頗有可取歐欲借以揚己之名致損其名阻妻弟薛
良孺之赦激成甥女之獄好名而名卒不保然猶可
曰君子之過也至漢議一節始則誤解經文後乃取
太后旨以杜庭議此豈正人所宜為乎或曰龐岡所